

DÍZRA'DAU' NEDXU DA BZUAJ SAN PEDRO

Dizra' gusel-la Pedro chee benne' ca' gucá'a Jesús, ne zaj nase dínnaje'

¹ Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. ² Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnalé'e le'e da chawe', ne xel-la' dxebeza zri lazre'.

Ca da dxebeza lázredxu

³ Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, ⁴ ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. ⁵ Lawe' da dxéajlele chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

⁶ Chee le' na' dxebéle'ele lácala dxun na ba xen tele xel-la' zi' tu chí'idau'. ⁷ Xel-la' dxeajlí lazre'

cheeḷe gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' cheeḷe, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

⁸ Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xel'é'ele Le', dxebéḷe'ele. Ca naca xel-la' dxebé cheeḷe naca na da zrente da quebe séquentu' xuzájla'antu' ⁹ lawe' da nalá bénne'du xu'ule lawe' da dxéajle chee Dios. ¹⁰ Lu iza da ba guledé gate nate, benne' ca' gulenné' waláz chee Dios buluxúe xánne', ne belexebéajni'e ca naca chee xel-la' we-selá nigá, na' buluchálaje' ca naca xel-la' chawe' chee Dios da gunne' le'e. ¹¹ Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. ¹² Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dizra' chawe' da ba bénquezle, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lázre' gubáz chee xabáa xeléajni'ine'.

Dios dxenné' dxi'u chee gácadxu bi lá'azxa chee'

¹³ Chee le na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunne' le'e lu zra na' gate xelá' Jesucristo.

14 Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios. 15 Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. 16 Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

17 Che dxennale le'e naca Dios Xrale, na' Le' dx-uchi'e ca da dxelún bénneache, dxal-la' zrēbele Le' dxácate ne zúale lu xezr la xu nigá. 18 Dios ba bselé' le'e lu da benle gate na' guxíajlele ca da belún xra xrtaule, da calela, na' ba nézquezle quebe guca na ne chee tu da dxuzru na ca oro, ne plata. 19 Bselé' le'e ne chee dxen zácale'e chee Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', be dxelutie' chee xunite lau Dios dul-la zaj nabague'. 20 Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee. 21 Ne chee Cristo dxéajlele chee Dios, Bénnea' bsebané' Le' ládujla benne' gate, ne bca'ane' Le' szren. Chee le na' dxéajlele chee Dios, ne dxuxrén lázrele Le'.

22 Na'a, ba bzúale dizra' chee xel-la' li ne chee Be' Lá'azxa, chee zri'ile dute lázrdaule benne' zaj nababe' dxi'u. Chee le na' dxal-la' zri'ile ljwézrele tule xetule dute lázrdaule, ne dute xel-la' wala chee. 23 Caní naca na lawe' da ba bexálajle, quegá chee bénneache, benne' dxelate. Nálajle ne chee dizra' chee Dios, da naca ban na, ne da zua na chadía chacanna. 24 Caní naca na lawe' da naxúaj na lu xiche lá'azxa, da dxenná na:

Xúgute bénneache zaj naque' ca xixre',

na' xel-la' szren chee' naca na ca xiaj chee xixe' du
ca'.

Xixre' na' dxebizre na, na' xiaj chee na dxexruj na.

²⁵ Dizra' chee Xránadxu zúatequeze na chadía channa.

Dizra' nigá ba benle le'e ne chee dizra' chawe' da dxuchálajntu'.

2

¹ Chee le na', québedxa gunle da calela. Québedxa nu si xele, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele. ² Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la. ³ Che da li ba guzú laule nézele naca Xránadxu chawe', na' gaca lázrele sídxale xrtizre'.

Cristo naque' ca xiaj xre ban

⁴ Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácale'e na.

⁵ Cá'aqueze le'e nácale ca xiaj ban ca'. Le güe Dios lataj guchínene' le'e chee gune' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. ⁶ Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne'

naque' ca tu xiaj blau chee xu'u,

da naca na tu xiaj du lazre',

ne da zácale'e na,

na' nu benne' chéajle'e chee Le'

quebe gaca xel-la' stu chee'.

⁷ Chee_{le} le'e dxéajle_{le} chee', xiaj nigá zácale'e na, san chee_{le} benne' ca' quebe dxéajle'e naca na ca da dxenná xiche lá'azxa:

Xiaj na' buluzúa benne' wen xu'u ca' chalá'ala, le_{le} na' naca na xiaj blau.

⁸ Cá'anqueze naca na ca dxenná xiche lá'azxa:

Naque' tu xiaj da dxehegu bénneache, na' lawe' le_{le} na' dxeajlecházie'.

Caní naca na, dxeajlecházie' lawe' da quebe dx-elezi'e dizra' chee_{le} Dios. Dios ba núnqueze' gaca caní chee_{le} benne' ca'.

Benne' zaj naque' bi chee Dios

⁹ Le'e nácale benne' ba gucá'a Dios. Nácale bxuze lu zrin chee_{le} Benne' Wenná Bea, Jesús. Nácale tu xezre lá'azxa chee_{le} Dios, na' Le' naxá'awene' le'e chee_{le} guzenle bénneache ca naca xel-la' szren chee_{le} Dios. Le' gunné' le'e chee_{le} xedxúajle lu da chul-la, na' súale lu xel-la' naxaní' li lazre' chee'.

¹⁰ Gate nate quebe nu bexache lazre' le'e, san na'a Diósqueze' dxexache lazre' le'e.

Zúale chee gunle zrin chee Dios

¹¹ Bi bicha' nazri'ite_{le} lazra', dxata' xueda' le'e, nácale ca benne' zaj zre'e zitu' naga zua lazre', chee_{le} quebe gunle ca da dxenná bēla' dxen chee_{le}, da dxedíl-lale_{le} na bēne'du xu'ule. ¹² Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lácala na'a dxelenné' chee_{le}, dxelenné' nácale benne' ca' dxelune' da zrinnaj, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

¹³ Lawe' da nácale bi chee Xránadxu, le guzúa dizra' ca da dxenná benne' xu'u lawe', bennea' buluzúa benne' xezre ca'. Le guzúa dizra' chee benne' nape' xel-la' dxenná bea zren, ¹⁴ ne chee benne' dxelenná bea, benne' ca' nase-la le' chee xuludé' xel-la' zi' benne' ca' dxelune' da zrinnaj, ne xelu'e ba lá'ana benne' ca' dxelune' da xrlátaje. ¹⁵ Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' calela chee dizra' chawe' da nazile.

¹⁶ Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. ¹⁷ Le gapa ba lá'ana xúgutę bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

Ca da guzaca zi' Cristo dxuzéajni'i na dxi'u

¹⁸ Le'e, bi wen zrin, le guzúa dizra' chee xránale dutę xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue chee, san cá'aqueze gunle chee benne' snia ca' zaj naque' xránale. ¹⁹ Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdxu naca na da dxezaca ba lazre' Dios. ²⁰ Che dxunle tu da calela, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na dutę xel-la' zren lazre' chee, da nigá naca na xrlátaje lau Dios. ²¹ Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da ben Le'.

22 Le' quebe bene' dul-la, ne quebe nu guzí xe'e.

23 Gate bulucháchalene' Le', quebe bi dizra' schanni' bechebe'.

Gate buludée' Le' xel-la' zi', Le' quebe bexéchaje'.

Bzua cuine' lu na' Dios, Bénnea' dxuchi'e ca da naca na. 24 Biá'queze Cristo na' lu bela' dxen chee' ca naca dul-la cheedxu gate gude'e le'e xaga begúaj, chee' gácadxu ca benne' gate, québedxa gundxu dul-la, na' gaca bandxu chee' gundxu da xrlátaje.

Le' guzri'e we' chee' xexácale le'e chawe'.

25 Le'e gudale gate nate ca zrila' zaj naníteba'.

Na'a ba bela'le lau Cristo, Bénnea' dxuxúe' le'e ca dxun tu benne' dxuxúe' zrila'du ca', ne dxe'e gunne xue chee' benne'du xú'ule.

3

Ca dxal-la' xelún benne' zaj nuchaga na'

1 Cá'anqueze le'e, nu'ula nuchaga na'le, le guzúa dizra' chee' benne' chee'le, na' che núlale zua benne' biu chee'le quebe dxéajle'e xrtizra Dios, xexúnbe'e naca na da li gate lé'ene' da xrlátaje da dxun zru'ule', ne quebe gun na ba xen bi guchalaj zru'ule', 2 lawe' da lé'ezené' da xrlátaje dxune' lawe' da naque' xrlátaje, ne dxape' le' ba lá'ana. 3 Ca lechítaje chee' tu nu'ula quebe dxal-la' gaca na cúzreze ca xel-la' dxupá'a xícha xíchaje', ne lechítaje da naca na oro, ne zra lane' da zácalle'e. 4 Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee' na. Da xrtan nigá naca na tu be' dxexruj lazre', ne zren lazre', da na' zácalle'e na lau Dios. 5 Cá'anqueze guca lechítaje chee' nu'ula ca' gulaque' bi chee' Dios gate nate. Nu'ula ca' buluxrén lazre' Dios, ne buluzúe' dizra'

chee benne' chee'. ⁶ Cá'anqueze guca Sara, bzue' dizra' chee Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

⁷ Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e dutę xel-la' chawe' chee'. Dخال-la' gunle caní chee quebe bi guzaga na le'e gate guchálajlele Dios.

Benne' dxeledé' xel-la' zi' lawe' da dxelunę' da chawe'

⁸ Na'a:

Le gaca tuze

Le xexache lazre' ljuwézrele, ne le zri'i ljuwézrele.

Le gaca benne' zri'i lazre', ne zren lazre'.

⁹ Quebe gunle da calela chee benne' dxunę' chee le da calela, ne quebe gucháchalele benne' dxulucháchalene' le'e. Le gun da chawe' chee benne' ca' lawe' da gunné' Dios le'e chee sile da chawe'.

¹⁰ Caní naca na lawe' da dxenná xiche lá'azxa:

Benne' dxaca lazre' gaca tu da ba neza chee',

ne sue' xel-la' dxebe

dxal-la' guxúe' luzre' chee quebe nne' dizra' schanni',

ne guxúe' dxu'e chee quebe nne na da wen lazre'.

¹¹ Dخال-la' gusanę' ca da calela bene',

ne québedxa gunę' na, chee gunę' da chawe'.

Dخال-la' cueche zrię' da ba xa',

ne gaque' benne' zren lazre'.

¹² Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinnaj ca'.

¹³ ¿Núzraqueze benne' gunē' cheeḷe da zrinnaj che le'e cuele gunne xue gunle da chawe'? ¹⁴ Lácala tele xel-la' zi' lawe' da dxunle da chawe', gaca na da ba neza cheeḷe. Quebe nu zrēbele, ne quebe xrúsale. ¹⁵ Le gapa ba lá'ana Cristo ca Xránale lu xichaj lárdaule. Le súateze ban lazre' xechébele lau benne' ca' dxelenabe' le'e bizr chee na' dxuxrén lárzele Le'. Le gun na lu xel-la' dxexruj lazre', ne le gapa ba lá'ana benne' ca'. ¹⁶ Le gun da chawe' chee quebe bi sua da gagu na zria lu xichaj lárdaule, na' benne' ca' dxelenné' schanni' chee da chawe' da dxunle lawe' da dxéajlel-le chee Cristo, xelapa stu'e ca dizra' da dxelenné'. ¹⁷ Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

¹⁸ Caní naca na lawe' da gudé Cristo tu lásaze lu xel-la' gute zi xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'. ¹⁹ Cá'anqueze lu be' nácaqueze' guxíaje' lataj chulla naga xeajchálajleḅe' be' zaj nácaqueze benne' ca' nuzaga xel-la' gute lu lataj na'. ²⁰ Benne' caní quebe buluzúe' dizra' ca da bchalaj Noé gate nate, gate na' guleza Dios dutē xel-la' zren lazre' chee' dxácate na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bēnneache. ²¹ Nisa xiuj na' dxulé'e na ca naca nisa naga dxelexedxúa benne' nisa, na' lu le na' nal-

adxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate, ²² ne begüene' xabáa, ne zue' chalá'a xabela chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

4

Dxal-la' gundxu zrin chee Dios guchínedxu ca da ba nunna Dios dxi'u

¹ Chee le na', ca ben Cristo, gudée' xel-la' zi' lu belá' dxen chee', cá'aqueze le'e dxal-la' si lu nale tele xel-la' zi' lawe' da che tu benne' ba gudée' xel-la' zi' lu belá' dxen chee', ba bzua bènea' chalá'ala da naca dul-la, ² chee gune' ca da dxaca lazre' Dios dxácatę naca banę', ne quebe gune' ca da dxenná belá' dxen chee'. ³ Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzrele, ne benle laní sban ca'. Güé'elę'elę', ne bca'ana szrenle bedau' xiaj xaga ca' da na' dxecuide Dios. ⁴ Benne' ca' quebe zaj núnbe'e Dios dxexebánene' lawe' da québedxa dxunle le' tuze ca naca da sban da dxelunę', na' chee le na' dxelennę' schanni' chee. ⁵ Benne' ca', dxun na ba xen xululé'ene' ca da zaj nune' lau Bènea' naca chee' guchi'e chee benne' ban ca', ne chee benne' gate ca'. ⁶ Benne' ca' zaj nate belenne' ca naca dizra' chee Dios chee xelexaca banę' lu be' zaj nácaqueze' ca naca ban Dios, lácala lu xęzr la xu nigá Dios bchi'e ca da belunę' ca guchi'e chee xúgute bénneache.

⁷ Ba za cheajsé chee xúgute da dxelé'edxu. Chee le na', le sua ban lazre', ne le guchálajlequeze Dios. ⁸ Da nácadxa blau, le zrí'ile'e ljuézrele. Che nazrí'idxu benne' bíchedxu ca', na' gunite laudxu da calela da belune' cheedxu. ⁹ Le guzúa lízrele ljuézrele tule xetule, ne quebe nnele chee ljuézrele. ¹⁰ Tu tule le'e dxal-la' gunle zrin chee ljuézrele ca da nunna Dios chee, ca benne' dxuluchínene' chawe' ca da chawe' da dxunezruj Dios chee'. ¹¹ Che nu benne' dxuchálaje', dxal-la' guchálaje' da gunezruj Dios le'. Che nu benne' guné' zrin chee, dxal-la' guné' na guchínene' xel-la' waca chee' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

Wadexu xel-la' zi' lawe' da nácadxu bi chee Cristo

¹² Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. ¹³ Le be lawe' da tele xel-la' zi' ca xel-la' zi' da gudé Cristo chee cá'aqueze béle'ele gate lé'ele xel-la' szren chee Cristo gate zezé'e. ¹⁴ Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'e xabáa. Dxelenné bénneache schanni' chee Le', san le'e dxápale Le' ba lá'ana. ¹⁵ Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. ¹⁶ Che nu benne'

dxedé' xel-la' zi' lawe' da naque' bi chee Cristo, quebe dxal-la' xedué'ene', san dxal-la' güe lá'ane' Dios lawe' da nazí le' bi chee Cristo. ¹⁷ Ba bzin zra su lau Dios guchi'e ca da zaj nun tu tu bi nácabe' chee Le'. Che Dios su lawe' guchi'e ca da nundxu dxi'u, ¿ájala gaca chee benne' ca' quebe dxeluné' ca dxenná dizra' chawe' chee Dios? ¹⁸ Che benne' xrlátaje ca' cánnaze xeelé' ¿ájazraqueze gaca chee benne' wen da zrinnaj ca', ne chee benne' wen dul-la ca'? ¹⁹ Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzúe' bénne'du zaj xu'e lu na' Dios, Bénnea' bene' le', lawe' da naca Le' li lazre'.

5

Pedro dxuzéajni'ine' bi ca' chee Cristo

¹ Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexecheba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gulé'ene' te chee zra caní. ² Ca dxelún benne' dxuluxúe' zrila' ca', le guxúe bidu ca' chee Dios, bénne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, ³ ne quebe gun cuínale ca xrane bénne'du ca' nabágale. Le gun ba xuzre gácale tu da gulé'e na ca dxal-la' xelún bénne'du ca'. ⁴ Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na. ⁵ Cá'anqueze le'e, benne' cuide', le gun ca da

dxelenná benne' gula ca'. Xúgutele dxal-la' guzúale dizra' chee ljwézrele tule xetule lu xel-la' dxexruj lazre' chee lawe' da dxenná xiche lá'azxa:

Dios dxezré'e benne' ca' dxulucá'ana szren cuine'.

Dute xel-la' chawe' chee' dxácalene' benne' dxexruj lazre' ca'.

⁶ Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na.

⁷ Le guzúa lu na' Dios xúgute da dxele gunne xue, lawe' da dxe' Le' gunne xue da naca chee.

⁸ Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'. ⁹ Le tíl-lale da xriwe', ne le se chacha lu xel-la' dxeajlí lazre' chee, lawe' da nézquezle dxeledéqueze xúgute bíchele zaj zre'e lu xezr la xu nigá xel-la' zi' ca da dxedele le'e.

¹⁰ Gate bache gudele xel-la' zi' tu chi'i, Dios guné' le'e li lazre', ne guzúa chawe'e le'e. Dios ná'queze dxunne' dxi'u xúgute da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. ¹¹ Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

Pedro dxugape' diuzre bi bíchedxu ca'

¹² Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

¹³ Bi chee Cristo zaj zre'e Babilonia nigá, benne' ca' gucá'a Dios ca guqué'e le'e, dxulugape' le'e diuzre. Cá'anqueze Marcos, bi na' nácabe' ca bi cheéqueza' dxugápabe' le'e diuzre. ¹⁴ Le gugapa diuzre ljuwézrele tule xetule, ne le gunida' ljuwézrele lu xel-la' zri'i lazre'.

Dxenaba' lau Dios gunne' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

80626b72-93df-58ae-9f5e-9d86733fab46